


प्रसार भारती
प्रादेशिक समाचार एकांश
आकाशवाणी रायपुर (छत्तीसगढ़)
प्रादेशिक समाचार बुलेटिन

18.10 शनिवार

दिनांक 28.03.2026



प्रमुख समाचार –

1— प्रधानमंत्री ह किहीन कि पश्चिम एशिया म चलत संघर्ष के बीच आर्थिक अउ व्यापारिक स्थिरता बनाय रखना सरकार के पहिली प्राथमिकता ।

2— प्रदेश के मुख्यमंत्री ह आज वीडियो कॉन्फ्रेंसिंग के माध्यम ले राज्य के उच्च अधिकारी मनके लीन बइठका ।

3— छत्तीसगढ़ म चलत प्रथम खेलो इंडिया ट्राइबल गेम्स के चौथा दिन आज रइपुर म होय तैराकी प्रतियोगिता म छत्तीसगढ़ के अनुष्का भगत ह पचास मीटर ब्रेस्टस्ट्रोक महिला वर्ग म जीतिन रजत पदक ।

.....

प्रधानमंत्री मुख्यमंत्री-बैठक

प्रधानमंत्री नरेंद्र मोदी ह किहीन हे कि पश्चिम एशिया म जारी संघर्ष के बीच आर्थिक अउ व्यापारिक स्थिरता ल बनाय राखे के संगेसंग ऊर्जा सुरक्षा अउ लोगन मनके हित के रक्षा करना सरकार के पहिली प्राथमिकता हवय । प्रधानमंत्री ह ए बात काली संज्ञा कतकोन राज्य के मुख्यमंत्री अउ केंद्र शासित प्रदेश मनके राज्यपाल के संग एक ठिन उच्च स्तरीय वर्चुअल बइठका म किहीन । बइठका के उद्देश्य संघर्ष के बेरा देस के तियारी के समीक्षा करना हवय ।

श्री मोदी ह राज्य मन ले अपील करीन कि ओमन आपूर्ति व्यवस्था बनाय राखे अउ जमाखोरी के खिलाफ कड़ा कदम उठावय। प्रधानमंत्री ह राज्य मन ले सौर ऊर्जा, जैव ईंधन अउ इलेक्ट्रिक मोबीलिटी जइसन वैकल्पिक ऊर्जा स्रोत मन ल अपनाय के बात किहीन अउ पाइप वाले प्राकृतिक गैस के बुनियादी ढांचा के बिस्तार करे के बात किहीन।

.....

मुख्यमंत्री-बैठक-01

इही बीच, मुख्यमंत्री विष्णुदेव साय ह पश्चिम एशिया म चलत लड़ई के स्थिति ल देखत आज रइपुर स्थित अपन निवास कार्यालय म वीडियो कॉन्फ्रेंसिंग के माध्यम ले राज्य के उच्च अधिकारी, कमिश्नर, आईजी, कलेक्टर अउ पुलिस अधीक्षक मनके बइठका लीन। ए दउरान ओमन पेट्रोलियम उत्पाद, एलपीजी अउ जरूरी जिनिंस के आपूर्ति व्यवस्था के समीक्षा करीन। बइठका म मुख्यमंत्री ह अधिकारी मन ल रसोई गैस के संगेसंग पेट्रोलियम उत्पाद मनके स्टॉक अउ सप्लाई के सरलग निगरानी करे अउ जमाखोरी के संगेसंग मुनाफाखोरी के खिलाफ कड़ा कार्रवाई करे के निरदेस दीन। ओमन किहीन कि राज्य के हरेक लोगन मन तक सेवा पहुंचना सरकार के पहिली प्राथमिकता हवय। मुख्यमंत्री ह आम लोगन मनले अपील करीन कि ओमन अफवाह उपर धियान इन देवय।

मुख्यमंत्री ह अस्पताल, छात्रावास, शिक्षण संस्था, केंद्र सरकार के संस्था, सैन्य अउ अर्धसैनिक बल के संगेसंग समाज कल्याण विभाग डहार ले चलाय जात संस्थान अउ एयरपोर्ट कैंटीन मन म गैस के व्यवस्था बने ढंग ले करे के निरदेस दीन।

.....

मुख्यमंत्री-बैठक-02

बड़का म एचपीसीएल, बीपीसीएल अउ आईओसीएल के अधिकारी मन ह मुख्यमंत्री ल बतइन कि प्रदेश म जरूरी जिनिस्, पेट्रोलियम उत्पाद अउ रसोई गैस पर्याप्त मात्रा म हवय। ओमन बतइन कि गैस सिलेंडर मनके ऑनलाइन बुकिंग बने ढंग ले चलत हे। उज्जवला गैस कनेक्सन बर पैंतालिस दिन अउ सामान्य गैस कनेक्सन बर पच्चीस दिन के बेरा राखे गेहे। एखरे मुताबिक बुकिंग करे जात हे। ओमन यहू बतइन कि पेट्रोलियम पदार्थ के गाड़ी मनके अवाई-जवाई म कोनो प्रकार के बाधा नइ हवय। प्रदेश म स्थिति सामान्य हवय।

वीडियो कॉन्फ्रेंसिंग के दउरान अधिकारी मन ह बतइन कि प्रदेश म खातू के कोनो प्रकार के कमी नइ हे। मुख्यमंत्री ह निरदेस दीन कि खातू मनके होल्डिंग उपर रोक लगाय जाय अउ रोजेच स्टाक मनके समीक्षा करे जाय। मुख्यमंत्री ह किहीन कि जम्मो किसान मन ल ओखर जरूरत के मुताबिक खातू दे जाय।

बड़का म जानबा दे गीस कि प्रदेश म तीन सौ पैंतीस जघा म छापा मारी करे गीस। जेमा कोनो जघा कालाबाजारी के पुष्टि नइ होय हे। फेर जमाखोरी के सूचना मिले के बाद कार्रवाई के दउरान करीबन चार हजार गैस सिलेंडर मन ल जब्त करे के संगेसंग संतानवे टिन एफआईआर दर्ज करे गेहे।

मुख्य सचिव विकाससील ह बतइन कि ए बेरा परिस्थिति के सरलग निगरानी करे बर राज्य स्तर म कंट्रोल रूम बनाय गेहे। उपभोक्ता मन घरेलू गैस ले जुड़े आपूर्ति या फेर कालाबाजारी के सूचना एक-आठ-सून्य-सून्य-दो-तीन-तीन-तीन-छह-छह-तीन म दे सकथे।

.....

लोकसभा-माओवाद मुक्त-चर्चा

देस ल माओवाद ले मुक्त करे के लक्ष्य के दिसा म केंद्र सरकार के प्रयास उपर तीस मार्च के लोकसभा म चर्चा होही। संसद के निचला सदन के कार्यसूची के मुताबिक ए बिसय उपर अल्पकालिक चर्चा नियम एक सौ तिरानवे के तहत सुरु करे जाही। एखर सुरुआत शिवसेना सांसद श्रीकांत शिंदे करही। ए दउरान सरकार के रणनीति, सुरक्षा अभियान अउ पुनर्वास नीति मन उपर सदन म बिस्तार ले चर्चा होय के संभावना हे।

जानबा के मुताबिक केंद्रीय गृहमंत्री अमित शाह ह कतकोन बार ए कही चुके हे कि सरकार के लक्ष्य इकतीस मार्च दू हजार छब्बीस तक देस ल नक्सलवाद ले मुक्त करना हे। इही लक्ष्य ल धियान म राखत केंद्र अउ राज्य सरकार ह मिलके काम करत हे, जेमा सुरक्षा अभियान के संगे माओवादी मनके पुनर्वास अउ मुख्यधारा म सामिल करे उपर बिसेस जोर दे जात हे।

.....

प्रधानमंत्री—मन की बात

प्रधानमंत्री नरेंद्र मोदी ह काली बिहनिया ग्यारा बजे आकाशवाणी ले 'मन की बात' कारीकरम म देस—विदेस के लोगन मनके संग अपन बिचार साझा करही। ए मासिक रेडियो कारीकरम के एहा एक सौ बत्तीसवीं कड़ी होही। कारीकरम के प्रसारण आकाशवाणी अउ दूरदर्शन के पूरा नेटवर्क, एआईआर, न्यूज वेबसाइट अउ न्यूज ऑन एयर मोबाइल ऐप म करे जाही। एखर सोज्जे प्रसारण एआईआर न्यूज, डीडी न्यूज, प्रधानमंत्री कार्यालय अउ सूचना प्रसारण मंत्रालय के यूट्यूब चैनल म घलो करे जाही। हिंदी प्रसारण के तुरते बाद आकाशवाणी ह क्षेत्रीय भाखा मन म घलो कारीकरम के प्रसारण करही।

.....

माओवादी—आत्मसमर्पण

कांकेर जिला म आज तीन झिन माओवादी मन ह पुलिस अधीक्षक के आगु आत्मसमर्पण करे हे। एमा एसीएम राधिका कुंजाम, संदीप कड़ियाम अउ रैनू पद्म सामिल हे। ए माओवादी मन ह तीन टिन हथियार घलो सौंपे हे, जेमा दू एसएलआर अउ एक टिन तीन सौ तीन राइफल सामिल हे।

.....

जिले की चिट्ठी

प्रादेशिक समाचार एकांश, आकाशवाणी रायपुर डहार ले प्रस्तुत कारीकरम “जिले की चिट्ठी” के प्रसारण काली संज्ञा छै बजके पांच मिनट ले छै बजके दस मिनट तक करे जाही। ए कारीकरम ल छत्तीसगढ़ स्थित आकाशवाणी के जम्मो केंद्र एके संघरा रिले करही। ए बखत के अंक म “महासमुंद” जिला के गतिविधि के बारे म जानकारी दे जाही।

.....

खेलो इंडिया ट्राइबल गेम्स

छत्तीसगढ़ म चलत प्रथम खेलो इंडिया ट्राइबल गेम्स के चौथा दिन आज तैराकी, वेटलिफिटींग, फुटबॉल अउ कुस्ती के मुकाबला होवत हे। आज रइपुर म होय तैराकी प्रतियोगिता म छत्तीसगढ़ के अनुष्का भगत ह पचास मीटर ब्रेस्टस्ट्रोक महिला वर्ग म रजत पदक जीतिन। ए अनुष्का भगत के चौथा रजत पदक हरय। उहें, रईपुर म होय पुरुष मनके अठयासी किलोग्राम भारोत्तोलन प्रतियोगिता म अरुणाचल प्रदेश के रूबा ताडु ह दू सौ चौहत्तर किलोग्राम वजन उठाके स्वर्ण पदक जीतिन। त उहें आंध्रप्रदेश के देवरकोंडा प्रेमसागर ह रजत पदक जीतिन।

अइसने, भारोत्तोलन प्रतियोगिता के सीनियर पुरुष चौरानवे किलोग्राम वर्ग म अरुणाचल प्रदेश के खिलाड़ी ह स्वर्ण पदक जीतिन। उहें, दूसर स्थान आंध्रप्रदेश के रिहीस।

उहें, अरुणाचल प्रदेश के वेटलिफटर अनाई वांगसु ह महिला मन के अंठावन किलोग्राम वर्ग म स्वर्ण पदक जीतिन।

.....

मौसम

अउ अब पेस हे मौसम के हाल...

प्रदेस म काली एक-दू जघा गरज-चमक के संग अंधड़ चले अउ गाज गिरे के संभावना बताय गेहे । मौसम विभाग के मुताबिक एक टिन द्रोणिका पश्चिम बंगाल ले तमिलनाडु होवत दक्षिण छत्तीसगढ़ तक बने हे । एखर प्रभाव ले बदली बारिस के स्थिति बन सकथे । बरसा के प्रमुख क्षेत्र सरगुजा अउ बस्तर संभाग ले लगे जिला मन सामिल हे ।

इही बीच, सरगुजा जिला के गांव चलगली बकनाकला म काली गाज के चपेट म आय ले एक झिन नोनी के मउत होंगे ।

.....

संक्षिप्त समाचार

अउ अब थोरकून समाचार सार म –

– उच्च शिक्षा संचालनालय ह प्रयोगशाला परिचारक के पद म सीधी भर्ती बर चुने गे चार सौ तीस अभ्यर्थी मन बर काउंसिलिंग के काम एक अउ दू अप्रैल के नवा रईपुर म करे जाही ।

– जांजगीर-चांपा जिला के गांव दुरपा म आज दू ठिन फटफटी ह आपस म टकरागे ए टक्कर म दू झिन युवक के मउकच म पराण छूट गे, त उन्हें, फटफटी म बइठे दू झिन लइका मन ह घायल हो गेहे ।

– इही जिला के शिवरीनारायण नगर पंचायत डहार ले डोंगा चलइया मनके डोंगा अउ मोटरबोट ल सील करे के विरोध म डोंगा चलइया मन ह आज तीसर दिन घलो धरना प्रदर्शन करत हे । डोंगा चलइया मन ह नगर पंचायत के सीएमओ उपर मनमानी करे के आरोप लगाय हे ।

